

IL CUART SAPIENT

Si à sinpri sintût a dî che i sapienz o res ch'a vignirin a fâj onôr al Frutin pene nassût a erin tre, ma no jè lafè cussì. And'ere cuatri: Gaspâr, Melchiôr e Baltassâr plui un âtri che, no vint podut esibîj nuje, no j à trat il cûr di presentâsi denant dal sant Canai cu lis mans scjassant. Al à pierdude l'ocasion grande di viodilu e la sorte di passâ ae storie. Ma nol inpuarte.

Il quart sapient nol ere mancûl savi di cheâtris nè mancûl bon. Al ere fat a sô mode e, biel cjalant il cîl, j sbrissave il vôi ancje su lis robis di cajû, salacôr mancûl altis ma no mancûl santis.

A erin partîz duc' i cuatri dal Orient, ognidun cul so regâl. E ogni regâl al ere biel e pal valôr e pal cûr che lu davin. Gaspâr al strengève il so aur pensant al misteri di un gnûf re; Melchiôr, nulint il so incens, al rumiave dentrivie dal gnûf predi; Baltassâr, cu la sô bocetute di mire, al ere il plui suturno di ducj. Cun ce fiât prontâsi denant di un frut cun (une robe che saveve di passion e di dolôr e di muart? Ma al ere chel il so don e al veve di puartâlu a bon fin. Il quart al veve siezût tre perlis, une plui pressiose e slusint di cheâtre, lis miôr ch'al veve te sô arcje dai tesauris.

Difarent di cheâtris tre, duc' cjàpâz de inpuartance dal misteri, lui j plaseve baratâ peraule cun chêi ch'al scuintrave dilunc fûr. Cence pierdi il so decoro mo, intindinsi. E cheste e fo la sô sfortune, disin cussì.

Parceche la seconde di s'inclapâ tune biade vedue che lave disperade a copâsi par no sintî a vaî di fan i siei fruz. E lui, suspirant, j regalà une perle. «Une mari e jè la plui bieie perle di chest mont. Tignît, paronute!» dissal il sapient. Tal indoman, biel jentrant te betule, al cjàtà doi puems, un fantat e une fantate, duc' malderz e cuintrifaz, che si sintiviju a sustà lontan une mie. La lôr streme puartât no ur dave la pussibilitât di meti sù cjase e lôr, disperâz, a erin scjanpâz cul fin di distrigâle e lassà un speli. «Viveit, fruz, e gjoldeisi la vuestre bieie etât e il vuestri amôr!» dissal il sapient. E ur consegnà une perle paronp, cunvint che l'amôr e jè la perle plui bieie e che une famèe gnove nissune zoe no j sta a pâr.

Cun chêi cuatri però al ere restât spodestît dal so regâl e par no passâ par malcreançât, al bandonà i siei conpagns e al tornà indaûr, displasint di no viodi il gnûf re ma cul cûr lisêr. «Si viôt ch'a ere destinade cussì» dissal. Al è par chel che Marie e viodè a rivâ dome tre savis e che la storie ju ricuarde dome lôr.

La sorprese plui grande però le verin Gaspâr, Melchiôr e Baltassâr ch'a sierarin i voi sun cheste tiere cunvinz di sei stâz lôr i prins a sei inluminâz de lus di Betlem. Cuanch'a rivarin, ae fin dal lôr viaç di chest mont e a meterin pît ta chel grant lusôr che nol cognos amont, Diu ur mostrà il so libri, là che si scrîf la vere storie, difarent di cheste e dibot dute ledrose. Tal grant libri di Diu, difat, al ere scrit in aur par prin il non dal quart sapient, e dome dopo il lôr. E lassù a capirin che Dui al veve rivât adore di viodi Crist ancje cence lâ fint a Betlem. Parceche Crist si lu à sinpri dongje. Baste vê vôi e cûr par viodilu.

La Patrie dal Friûl di Zenâr dal 1984, n. 1